



Mes amis, prêtez bien l'oreille,  
J'vas vous dire un n'séquoi d'nouviau :  
On vient de r'trouver eun' merveille,  
Qu'on appelle l'Fontaine del Saulx.  
Rien que ch' nom nous rappell'l'histoire  
De ch'gueux d' Phinaert et d' Lydéric,  
Deux gaillards qui s' sont griblés d' gloire  
A grands cops d'pic !...

D' vos bourse' i faut, sans peine,  
Déloyer les cordiaux,  
Et nous r'verrons l' fontaine  
Del Saulx.

Si ch'est vrai chin qu' m'a dit m' gra-mère,  
Phinaert n'étoit qu'un vrai capon,  
Qui d' Lydéric, avot tué l' père,  
Et rinserré l' mère in prijon.  
Heureus'mint pou' cheull' pauver femme,  
Qu'avant d'êt' dins l' main de ch' brigand,  
Elle avot, tout près d'eun' fontaine,  
Porté s'n infant.

D' vos bourse' i faut, sans peine...

A cheull' fontaine un pauve ermite,  
Un jour s'in allant quère d' l'iau,  
Intindant braire, i vett' bien vite.  
Quoi-ch' qui vot ? un infant fort biau !  
I l' prind dins ses bras, il l'imbrasse,  
R'merci' Dieu, s'apprête à l' bénir..  
Un n' séquoi pourtant l'imbarrasse...  
Ch'est pou' l' norir.

D' vos bourse' i faut, sans peine...

De n' pouvoir li servir de mère,  
Ch' pauve ermite avot du chagrin...  
Mais l' bon Dieu n'a point mis su' l' terre  
Des infants, pou' mourir de faim.  
Il invoie eun' biell' gross' maguette,  
Pour donner du lait à ch' marmot,  
Et l'infant, avec d' bonn's têtes,  
A v'nu fin gros.

D' vos bourse' i faut, sans peine...

Lydéric a dins ch'l ermitache,  
Resté jusqu'à l'âche d' vingt ans.  
Alors, connaissant sin corache,  
L'ermit' li dit : « Part ! il est temps.  
Vas-t'in trouver le roi Clotaire,  
D'mand'-li eun' compani' d' soudarts,  
Et te viendras délivrer t' mère,  
In tuant Phinaert... »

D' vos bourse' i faut, sans peine...

Lydéric va trouver l' roi d' France,  
I li dit s'n affaire in deux mots.  
Clotair' répond : « Cha cri' vengeance !  
I faut l' tuer comme un escargot!...  
Dès d'main nous s' mettron' in voyache,  
Pour aller trouver ch' gueux d' Phinaert ;  
Tiens, v'là m' lance ! i faut percher ch' lache  
Comme un bout d' lard. »

D' vos bourse' i faut, sans peine...

Un jour, on intind dins tout Lille,  
Des tambours, des fif's des clairons...  
Ch'est l' cortèch' du roi qui défile  
D'avant Phinaert, furieux comme un lion.  
Lydéric aperchevant ch' traîte,  
Moute l' poing et li cri' : « Capon,  
A mourir i faut qu' te t'apprêtes,  
Cha n' s'ra point long... »

D' vos bourse' i faut, sans peine...

Aussitôt l' victime et l' coupable,  
Au grand galop mont'nt su' des qu'vâs.  
Ch'étoit pus d's homm's, ch'étoit des diables !  
I s' lardott'nt comm' des cervelas...  
Mais Phinaert, perdant l' résistance,  
Quai à terre in criant : « Malheur !! »  
Lydéric, avecque s' grand' lanche,  
Li perche l' cœur !!!

D' vos bourse' i faut, sans peine...

Ch' brav' garchon a délivré s' mère,  
Aussitôt qu'i s'a vu vainqueur ;  
Cheull' pauver femm' s'a mi à braire,  
In pressant sin fieu su' sin cœur...  
Et, vettiez chin qu' ch'est de l' nature,  
D'puis vingt ans qu'é n' l'avot point vu,  
Rien qu'in arrivant, à s' tournure,  
Elle l'a r'connu !...

D' vos bourse' i faut, sans peine...

Pour que dins mille an' on s' rappelle  
Ches deux Lillos d'un si grand r'nom,  
On va faire eun' fontain' nouvelle  
Au moyen d'eun' grand' souscription.  
In signant, on pora peut-être  
Dire un mot chacun pou' s'n argent.  
Mi, j' proposs' qu'on mette eun' maguette  
Sus l' monumint.

D' vos bourse' i faut, sans peine,  
Deloyer les cordiaux ;  
Et nous r'verrons l' fontaine  
Del Saulx.

